

四庫全書

子部

欽定四庫全書

子部

分門古今類事卷九至十二

詳校官中書臣朱文翰

檢討臣何思鈞覆勘

總校官中書臣朱鈐

校對官中書臣郭晉

謄錄監生臣席大賓

欽定四庫全書

分門古今類事卷九

相兆門上

公孫見子

魯文公元年春王使叔服來會葬公孫敖聞其能相人也見其二子焉叔服曰穀也食子難也收子穀也豐下必有後于魯國後八年教奔莒魯人立文伯文伯乃穀也穀之子蔑是謂孟獻子蔑之子速是謂孟莊子速之

子羯是謂孟孝伯羯之子驪是謂孟僖子驪之子何忌  
是謂孟懿子何忌子羸是謂孟武伯九世為卿故曰食  
子謂奉祭祀以供養也十五年穆伯卒於齊難乃立為  
惠叔乃請收而葬之叔服之言豈不信而有驗歟

左傳

黥布當王

黥布姓英氏少時客相之當刑而王及壯坐法布欣然  
笑曰人相我當刑而王幾是乎人有聞者共戲笑之布  
以罪有論輸作于驪山陳勝起與驪山徒數千人屬項

梁梁死布常為項羽前鋒遂封布為九江王都六後歸  
漢立為淮南王南面而立果膺裂地之貴當刑而王其  
相已定於卑微之時矣聞而戲笑者能無愧乎

漢史

### 衛青封侯

衛青字仲卿父鄭季以縣吏給事陽信侯家季與僮衛  
媼通生青青有同母兄衛長君及姊子夫得幸武帝故  
冒姓衛氏青少時歸其父父使牧羊嘗以奴畜之不以  
為兄弟數青嘗從人至甘泉居室有一鉗徒相青曰貴

人也官至封侯青笑曰人奴之生得無笞罵足矣安得封侯事乎及壯為侯家騎從平陽主建元二年青姊子夫得入宮幸上皇后大長公主女也聞子夫幸妬之使人捕青青時給事建章未知名大長公主欲殺青其友公孫敖篡之得不死上聞迺召青為建章監侍中由是益顯後將軍擊匈奴取河南地為朔方郡封長平侯拜大將軍子孫皆侯貴盛莫比鉗徒之言豈不信哉

西漢

鄧通穿衣

鄧通蜀郡人為黃頭郎文帝夢上天不能有一黃頭郎  
推而上之顧見其衣尻帶後穿覺而之漸臺以夢中陰  
自求之見通衣後穿夢中所見也召問其姓名姓鄧名  
通鄧猶登也文帝甚悅尊幸之日日異賞賜具萬以十  
數上使善相人者相通曰當貧餓死上曰能富通者在  
我何說貧於是賜通蜀嚴道銅山得自鑄錢鄧通錢布  
天下其富如是後為太子心恨及景帝立免通家居居  
無何人告通盜鑄錢盡沒入之通家尚負責數鉅萬長

公主賜通吏盡沒之一簪不得著身長公主乃令假衣  
食竟不得一錢寄死人家一如相者之言嗚呼文帝以  
天子之勢猶不能使鄧通免於貧餓乃知貧富素定區  
區人力不可得而變也

西漢倭  
幸傳

### 亞夫餓死

周亞夫太尉勃之子也為河內守時許負相之曰君後  
三歲而侯侯八歲為將相持國柄貴重人臣無二後九  
年而餓死亞夫笑曰臣之兄已代父侯矣有如卒子當



代我何侯乎然既以貴如負言又何說餓死指視我負  
指曰從理入口此餓死法也居三歲兄絳侯勝之有罪  
文帝擇勅子賢者皆推亞夫迺封條侯景帝時為太尉  
將兵破吳楚五年迺為丞相後以爭立太子事上踈之  
謝病免相居無何坐買甲楯下廷尉獄不食五日嘔血  
而死許負之言竟無毫髮之差非前定而何

西漢

### 李固奇表

李固字子堅漢中南鄭人貌狀有奇表鼎角匿犀足履

龜文公侯之相也後果為漢太尉漢太尉三公也

范煜

漢書

張裕撫鏡

蜀郡張裕善相術每舉鏡視面自知其必以刑死未嘗不撲之於地後果被誅故劉孝標謂撫鏡知其將刑其兆發於前期信哉

蜀志

羊祜建功

羊祜字叔子泰山南城人嘗遊汶水之濱遇父老謂之

曰孺子有好相年未六十必建大功於天下既而去莫  
知其所之祜後建平吳之策卒時年五十八後二歲而  
孫皓平羣臣上壽帝執爵流涕曰此羊太傅之功因以  
尅定之功祭告祜廟以此而驗汶上老人之言則已素  
定於六十年前矣功名之際豈可僥倖其或成哉

晉史

### 周陶略同

周訪字士達家于廬江潯陽少時遇善相者廬江陳訓  
謂訪與陶侃曰二君皆位至方嶽功名略同但陶得上

壽周得下壽優劣更由年耳訪小侃一歲後訪為梁州刺史都督梁州諸軍年六十一卒侃為荊江二州刺史都督八州諸軍年七十六陳訓之言位皆方嶽上壽下壽皆驗矣以此知無一而不前定也

晉史

馮婁共見

唐婁師德為揚州江陽尉馮元常亦為尉共見張同藏同藏曰二君俱貴馮位不如婁馮唯取錢多即官益進婁若取一錢官即敗後馮為浚儀尉高宗時擢監察御

史劔南道巡察使位至尚書左丞婁終不敢取一錢位至納言家極貧匱以此知官之崇卑家之貧富皆前定

不虛也

朝野僉載

欣泰傷額

張欣泰字義亨竟陵人少時有人相其當得三公而年才三十後忽屋瓦墜傷額又問相者云無復公之相矣然年壽更增亦可得方伯焉後果為雍州刺史年三十六而卒

南史

昭達眇目

章昭達字伯通吳興武康人少時遇相者謂曰卿容貌甚善須少虧則當富貴梁大同中因醉墜馬鬚前小傷昭達喜問相者曰猶未也及侯景之亂為流矢所中眇一目相者見之曰卿相善矣不久必富貴及景平陳文帝委以將帥恩寵超於儕輩後為開府儀同三司

南史

沈攸乘舟

沈攸之字洪先吳興武康人初賤時與吳郡孫超之全

景文共乘一小船出都三人共上埭岸有一人止而相  
之曰君三人皆當至方伯攸之曰豈有此相者曰不驗  
便是相書誤耳後攸之為郢荆二州超之廣州景文南  
豫州刺史皆如其言大抵富貴貧賤皆注定於稟生之  
初而形於相貌之外惟精於術者始得而知之許劭嘗  
云懸絲於牖望之百日則其絲久而愈大又懸五彩絲  
望之百日久而顏色愈明然後可以觀人之形氣今之  
偷妄輩求衣食妄言人之形神禍福安足信哉

南史

安仁封侯

李安仁蘭陵人也少時貧有一人從門過相之曰君後當富貴與天子交手共戲明帝嘗目安仁曰卿面方如田封侯相也後齊祖即位安仁為中領軍封康侯國家密事上唯與安仁論議武帝即位加侍中富貴極于一時自致榮寵如相者之言其後安仁欲尋相者竟不知此人所在豈神靈託相以告之耶

南史

管輅不達



管輅字公明嘗自謂其背無三甲腹有三壬非貴壽相  
後果官止少府丞年終四十八梁武帝嘗與諸名賢歎  
其奇才而位不達劉孝標謂士之窮達莫非命也乃作  
辨命論以述其旨曰世固有高才而無貴仕饕餮而居  
大位者自古所歎焉獨公明而已哉

文選

### 建平術驗

朱建平沛國人善相術魏太祖召為郎文帝為五官將  
坐客三十餘人文帝問已壽又令徧相衆賓建平曰將

軍壽八十至四十當有厄謂夏侯威君四十九位為州牧而亦有厄謂應璩曰君六十二位為常伯先此一年當獨見一白狗而旁人不見也謂曹彪曰君封藩國至五十七必厄於兵宜防之後文帝至黃初七年年四十七病困謂左右曰建平所言八十謂晝夜也吾其決矣頃之果崩夏侯威為兗州刺史年四十九十二月上旬得疾念建平之言自分必死至下旬轉差垂以平復三十日晨設酒曰吾明日鷄鳴年便五十及罷客後合瞑疾

動夜半卒據六十一為侍中直省內歛見白狗問之衆  
悉無見者於是數聚會急游觀飲宴自娛過期一年六  
十三卒曹彪封楚王年五十七坐與王凌通賜死凡說  
此輩無不如言一何妙哉

三國志

### 天網術驗

袁天綱成都人與杜淹王珪韋挺游天綱謂淹曰蘭臺  
學堂全將以文章顯謂珪法令成就天地相臨不十年  
官五品而謂挺面如虎當以武處官然三君久皆得譴

淹果入天策為學士珪太子中允挺為右武帥武德中  
俱流雋州見天綱曰公等終且貴杜三品難言壽王韋  
亦三品後於杜而壽過之但晚節皆困見岑文本曰眉  
過目文才振海內雖得三品恐是損壽之兆文本後果  
至中書令尋卒見竇軌曰後十年且顯立功在梁益軌  
後果為益州行臺僕射見房元齡李審素曰房大富貴  
李欲得五品即從房求之李不信之後房為宰相李為  
起居舍人卒房言於帝以五品官贈之武后幼天綱見

其母曰夫人必生貴子乃見元麝元奭曰官三品保家  
人也見韓國夫人曰此女貴而不利夫后最幼抱以見  
紿曰男天綱視之驚曰龍瞳鳳頸極貴驗也若為女當  
作天子見張行成馬周曰近古君臣相遇未有及公者  
然壽不長也張晚得官位宰相高士廉謂曰君後得何  
官天綱曰自知相祿已絕不合更有及夏四月數盡如  
期而卒其精微不可具紀同時有張憬藏者技與天綱  
並撫遺

集

憬藏術驗

張憬藏長社人也太子詹事莊儼有所問答曰公厄在三尺土下盡六年而貴位刺史無有祿矣儼使高麗囚居土室六年還為蒲州刺史歲如期召掾吏妻子告當死俄詔聽致仕劉仁軌與靖賢清占答曰劉當五品而譴終位冠人臣謂賢曰君法當客死仁軌為尚書僕射賢曰我三子皆富田宅何客死俄三子盡喪鬻田宅寄死友家魏元忠往見之久不答乃大怒曰窮通貧賤自

屬蒼蒼何預君耶拂衣去憬藏遽追還曰君之相在怒  
時位必卿相姚崇李迥秀杜憬佺從之遊憬藏曰三人  
皆宰相姚最貴裴光庭當國憬藏以紙大署台字後數  
日貶台州其驗甚多不可盡載至明皇時有金梁鳳者  
頗言人貴賤壽夭

撫異集

### 梁鳳術驗

裴冕為河西留後梁鳳言不半載兵起君當以御史除  
宰相又言一日向雒一日向蜀一日向朔方此時公當

國冕妖其言絕之俄而安祿山反冕以御史中丞召問  
以三日答曰雒日即滅蜀日不能久朔方日愈明肅宗  
即位而冕遂相又謂呂諲曰君且輔政須大怖乃得諲  
責驛吏榜之吏突入射諲兩矢幾中走而免明年知政  
事李揆盧允毀服紿謁鳳不許二人語以情鳳曰李舍  
人閱歲而相盧不過郎官後揆已相乃擢盧吏部郎中  
夫自漢至唐能以相技顯于世者如前數子誠皆玄妙  
之殊巧非常之絕藝故備錄之以為浮躁者之戒

定命錄



祿山異聞

唐明皇朝退召祿山陞殿用銀裏小杌子賜坐詢問甚久方令引退肅宗因暇陳曰自古正殿人臣不可坐陛下縱愛之但加之祿秩賜之金帛可矣明皇不荅異日朝退又召祿山賜坐肅宗乃懷疏伏於寢殿青蒲上曰臣於家與陛下父子也於朝與陛下君臣也至親切無如君臣父子矣臣嘗言正殿人臣不可坐陛下又召祿山賜坐金口詢問移時方去是臣言無所用且臣位

為太子更欲何圖若坐視朝廷之禮有所不正而不言是臣陷君父于有過之地則臣之不忠不孝之罪可知也因泣涕交下玄宗遽命引起辟去左右撫其背曰是非吾兒所能知也此子有奇相吾以此厭之也肅宗曰若然則何不殺之玄宗曰殺假恐生真肅宗乃還東宮私念默求計以殺之一日召祿山飲乃先教宮人曰若吾索壽酒汝當進鵠祿山至酒數行肅宗曰將軍與吾家親愈骨肉義極君臣然將軍亦謹厚吾頗喜也今日

願與將軍為壽乃命左右進壽盃祿山舉之將飲適會  
鶯嚙泥墮盃中祿山乃不飲復置盃於坐起曰臣蒙殿  
下賜酒已醉乃再拜而去初祿山生於南陽李筌為鄧  
州刺史嘗夜見東南有異氣明旦呼吏詢其所乃得牧  
羊胡婦之子筌見之曰此假天子也座客勸殺之筌曰  
不可此牧豎必於國為盜古有之殺假恐生真矣

撫遺集及

唐宋  
遺史

姚崇甚貴

陝州刺史王當有女甚愛之集州縣文武官令善相者  
擇壻相者曰此無貴壻惟識果毅姚某者有貴子可嫁  
之終必得力當從其言遂嫁之時人咸笑焉乃元崇也  
時年二十二好獵都未知書嘗詣一親表飲遂遇相者  
謂之曰公甚貴異日必為宰相歸以告其母母勸令讀  
書崇遂割放鷹鷄折節學仕為孝敬挽郎舉下筆成章  
後為同州刺史先天二年明皇講武新豐故事天子行  
幸牧守在三百里外者詣行在帝密召崇既見帝曰公

知獵乎對曰少所習也臣年二十以鷹犬為樂遇相者  
令無自棄今猶能之帝喜乃咨天下事衮衮不倦帝曰  
卿宜遂相朕崇乃說帝十事而後輔政為開元名宰昔  
人嘗云龍犀日角帝王之表河目龜文公侯之相觀諸  
姚崇輩以驗相者之言無一而不應孰謂相之可非乎  
唐史

景融坐廳

陸景融為新鄭令有客相之曰公從今三十年當為此

州刺史然於法曹廳上坐陸公不信時陸公記法曹廳有桐樹後三十年果為鄭州刺史所坐廳前有桐樹因問之乃云此廳本是法曹廳往年刺史嫌宅窄遂通法曹廳為刺史廳乃知昔日之言方應

定命錄

父穎登第

父穎侍郎少貢入京途逢一叟曰子相甚貴當登第授以書一策乃左氏穎異而熟讀之及禮部試鑄鼎象物賦出所授書穎喜甚援筆立成若有相之者果登第致

甲科

澠水燕談

錢鏐非常

錢鏐臨安人少有大志縣錄事鍾起諸子與鏐善而起  
常禁之豫章有術者言斗牛間有王氣乃遊錢塘以相  
法求其人鍾起與術者善乃召縣豪令視之皆言其非  
一起諸子與鏐會而術者適來望之大驚曰此真貴  
人也起乃召鏐使熟視之術者曰君之貴必因此人乃  
慰而遣之自是起頗厚待於鏐時時賑其窮之後鏐王

錢塘宴父老于里中山林皆覆以錦繡起父子並列貴

仕焉

唐玠  
遺史

張相夢應

張商英元祐丁卯二月夢遊五臺山金剛窟平生耳目  
所不接想慮所不到覺而異之時為開封府推官以告  
同舍林材中材中戲曰天覺其官并州乎後五月商英  
果除河東提點刑獄公事材中曰前夢已驗勉矣行焉  
人生事事預定何可逃也八月至部十一月即詣金剛



寤驗所見者皆與夢合信乎材中之言人事之預定矣

詹玠  
遺史

分門古今類事卷九

欽定四庫全書

分門古今類事卷十

相兆門下

班超封侯

班超少時有相者曰子雖布衣諸生當封侯萬里外超問狀相者曰燕頷虎頭飛而食肉此萬里侯相也後果立功西域封定遠侯

後漢

王暉懷刃

趙溫善柔許之術武將王暉事蜀先主有功為一二貴臣所抑王銜之一日遇趙溫溫曰今日見君面有殺氣但君將來當為三任郡守一任節制自是晚達不宜害人王乃出一匕首曰今日欲殺數子便自裁不意逢君請止後果為郡守三任遷秦州節度如溫之言皆前定而形於相也

成都記

鍾輻亡家

江南鍾輻者金陵之才子年少俊邁遇一老僧相之曰

先輩壽則有矣及第則家亡記之生大怒曰吾方掇高  
第以起家何亡之有時樊若水女才質雙美盛愛輻之  
才而妻之始燕爾科詔遂下時周都洛輻入洛應詔果  
中甲科方得意狂放不還携一女僕曰青箱過華州之  
蒲城其宰乃故人延留之數日時盛暑追涼於縣樓醉  
寢是夕醉夢其妻出詩一首為示怨責頗深詩曰楚水  
平如練雙雙白鳥飛金陵多少地一去不言歸夢中戲  
答一詩曰還吳東下過蒲城樓上清風酒半醒想得到

家春已半海棠千樹欲彫零既覺遽歸裝將至采石渡  
青箱暴卒生感悼忽忽藁葬於一新墳之側急圖到家  
至則門巷空闌妻妾已亡數月訪之親鄰妻亡之夜乃  
夢於縣樓之夕也後數日親友具舟携輻致奠於葬所  
即青箱藁葬之側其墳不植他木惟海棠數株花萼彫  
謝正合詩中之句因拊膺長慟曰信乎浮屠老師之言  
及第家亡之兆矣因遂不仕隱鍾山壽八十餘卒嗟夫  
禍福壽夭莫非前定而海棠之千樹亦復兆於詩句以

此知一草一木皆有定數非人力所能及也

潘佑集

### 王顯夕死

唐王顯與文武皇帝有子陵之舊帝微時常戲顯曰王顯抵老不作繭及帝登極顯因奏臣今日得作繭否帝笑曰未可知也召其三子皆授五品顯獨不及謂曰卿無貴相朕非為卿惜也顯曰朝貴而夕死足矣房玄齡曰陛下既龍潛之舊何不試與之帝乃授之三品取紫袍金帶賜之其夜暴卒嗚呼靡顏膩理哆喙顙頤形之

異也朝秀晨終龜鶴千歲年之殊也聞言如響智昏菽  
麥神之辨也固知三者定乎造化至於壽夭窮達獨曰  
由人不亦蔽乎

朝野  
僉載

中立為將

唐杜羔字中立少年時膽於財產他無所長其徒與之  
遊利其酒炙其實蔑視之也一日同送迎於城外客有  
善相者歷觀諸賓侶獨指中立曰此子異日當為將矣  
一座大笑中立後尚真源公主為滄州節度使果符相



者之言嗚呼士之窮通無非命也故昔公孫弘主父偃  
對策不第歷說不入牧豕淄原見棄州部其詬恥為何  
如哉及至開東閣列五鼎遂窮極富貴聲馳海外非先  
愚而後智前非而終是也蓋亦榮悴有定數非人力之  
所召自古皆然何獨中立而已乎

玉泉子

### 李寬三無

李寬為常侍有門下士姓盧善相或問李公何如曰據  
其面所無者三無子無宅無冢公初有數子皆先卒有

屋未嘗還鄉安居死於舟乘舟而歸舟破沉其骨焉

金華

子

冀公十全

王冀公欽若鄉薦赴闕張齊賢時為江南漕以書薦謁  
錢希白易希白方以才名獨步館閣適會延一術士以  
考休咎不容通謁冀公跼促門下因厲聲語閤人術者  
遙聞之謂錢公曰不知何人若形與聲相稱世無此貴  
者但恐形不副聲願邀之庶獲一見錢召之冀公卑微

遠人神貌踈瘦復贅於頸舉止山野錢公蔑視之術者  
悚然側目瞻視冀公起術稽顙興歎曰人中之貴有此  
十全者錢公戲之曰堂內便有此等宰相乎術者正色  
曰公何言歟且宰相何時而無此君不作則已若作之  
則天下康富君臣相得至死有慶而弔所不完者但無  
子爾錢公曰他日將陶鑄吾輩乎術者曰恐不在他日  
即日可待願公無忽後錢公方為翰林學士而冀公已

真拜矣

朝野  
雜錄

种放帝友

种隱君放方少時與弟文往拜陳希夷陳邀放內堂慇懃眎睨以一絕贈之曰鑑中有客白髭多鑑外先生識也麼只少六年年六十此中陰德莫蹉跎种都不曉但屈指以三語授之曰子貴為帝友而無科名晚為權貴所陷若寡慾可以滿此數种因不娶真宗初詔至闕稱旨以司諫奏十議西祀回蹕次河中時長安父老三二餘人具表乞臨上意未決召种至行在以決之种奏大

駕此幸有不便者三陛下以孝治天下毓事秦漢侈  
心封禪羣獄更臨遊別都久拋宗廟於孝為闕不便一  
也百司供擬頓仗事繁晚春蠶麥已登深廢農務不便  
二也精兵重臣扈從車蹕京國一空民心無依況九廟  
乎陛下宜深念之三不便也上正色悚然曰臣僚無一  
語及此放曰近臣但願扈清蹕行曠典文頌聲以邀已  
名陛下當自悟於清衷也翌日還闕真宗欲放從駕放  
辭上曰非久當召既而大臣深忌之恐還闕後必召放

乃先布所陷之基使雷有終諷之曰非久朝廷必召慎  
勿輕起以存隱節徐章一奏乞覲以問鑒與還闕良苦  
乃君臣之義也种然之上還京欲召放大臣奏放必辭  
乞陛下記臣語往往自乞覲詔下果不至上已微惑後  
半年河陽孫奭奏放請覲上大駭召執政曰率如卿料  
由是寵待遂解是年亡种少時有瀟湘感事詩曰離離  
江草與江花往事洲邊一嘆嗟漢傳有才終去國楚臣  
無罪亦沉沙淒涼野浦寒飛鴈牢落汀祠晚聚鴉無限

清忠沉浪底滔滔千頃屬漁家誠先兆也然當時陷放者雖自以為得計不知陳希夷已言於少之時矣是則命已定特假手於權貴也可不信哉

雜錄

若水公卿

一說白閣道者  
事見此卷後

錢文僖若水少時謁陳搏求相骨法陳戒曰過半月請子却來錢如期而往至則邀入山齋地爐中一老僧擁壞衲瞑目附火於爐傍錢揖之僧開目微應無待遇之禮三人者默坐久陳曰如何僧擺頭曰無此骨錢公起

陳戒曰三日却來錢如期謁之搏曰吾始見子神觀清  
爽謂可學神仙有昇舉之分見之未精不敢奉許名此  
僧決之渠言子無仙骨但他日必為貴公卿耳錢曰其  
僧何人曰麻衣道者雜錄

乖崖鬚瘡

乖崖公張詠太平興國二年科場試不陣成功賦蓋太  
宗明年有河東之舉公賦云包戈卧鼓豈煩師旅之威  
雷動風行舉協乾坤之德自謂擅場既有司以對偶



顯失黜之選胡旦為狀元公憤然欲學道陳希夷相之  
曰必為貴公卿一生辛苦譬如人家張筵方笙歌鼎沸  
而中庖火起坐客無奈惟賴子滅之以詩遺曰征吳入  
蜀是尋常鼎沸笙歌救火忙乞得江南佳麗地却應多  
謝鬢邊瘡初不曉其旨後二年公乃及第兩入蜀定均  
順之亂又急移餘杭剪左道僧紹倫之叛此征吳入蜀  
之驗也累乞閒地不允後以鬢瘡乞金陵養疾方許希  
夷之言一無差誤初公在蜀與一僧善及歸僧送至鹿

頭出一書付僧曰收此至乙卯年七月二十六日請於  
官對衆開之慎不可私發並不待其日者有禍至大中  
祥符乙卯歲僧乃詣府陳之知府凌策侍郎集從事共  
開之乃公真容手題曰詠當血食於蜀後數日得報公  
以其年七月二十六日捐館未捐館前公舊與逸人傅  
霖善霖隱不仕公後中第日光顯散遣親密四方求霖  
三十年不可得嘗作憶霖詩云寄語巢由莫相笑此生  
終不戀輕肥後一日卧鈴閣有被褐騎驢者叩門曰語

尚書青州傅霖來閤吏入白公驚喜出迎責吏曰傅先生汝敢姓名呼耶霖笑曰別子一世尚爾童心是豈知世間有我哉公問何昔隱今出霖曰子將去矣故來報子曰詠亦自知之霖曰知乃去後一月公薨此足以見出處生死皆有前定非復由人也

筆談及西清詩話

### 師德跛足

袁客師天綱之子也傳其父業嘗與一書生同過江登舟訖遍視舟中入顏色謂同侶曰不可速也遂相引登

岸私語曰舟中數十人皆鼻下黑氣大厄不久豈可知而從之但少留未發間忽見一丈夫神色高明跛一足負杖驅驢登舟客師見此人乃曰可以行矣貴人在內吾儕無憂登舟而發至江中風濤忽起危懼雖甚終濟焉驅驢丈夫乃婁師德也後位至於納言焉

咸都記

### 元景大貴

柳元景字孝仁河東解人也少時貧苦嘗行至都下遇大雷雨日暮寒甚頗有羈旅之嘆岸側有一老父自稱

善相謂元景曰君方大富貴位至三公元景以為戲曰  
人生免饑寒幸甚豈敢更望富貴老父曰後當相憶及  
後果貴求向者老父不知所在以此觀之富貴早晚皆  
有前定或先號而後笑或始困而終吉得之咸本於自  
然不假道於才智修己俟時可也安用戚戚於貧賤哉  
南史

李嶠不富

李嶠幼有清才兄弟三人相者云皆不過三十嶠已長成母甚

憂之相者又謂曰即君神氣清秀而壽不永恐不得過三十其母大戚留相者使與嶠連榻而寢至更深李睡已熟相者視之無喘息氣以手候之鼻下氣絕大驚良久候其氣乃在耳中遂撫而告之曰得之矣因賀其母云郎君必大貴壽乃是龜息但貴壽而不富耳後至則天朝拜相而家常苦貧後帝幸其宅見嶠卧青布帳帝曰相國如是失國之體賜御用繡羅帳嶠寢其中達曉不安覺其體生疾遂自奏曰臣少被相人云不當華富

故寢不得安帝嘆息久之任令用舊者乃安寢夫嶠既  
為相位極人臣不為不貴矣而一羅帳不能當之以此  
而驗相者之言謂命非前定可乎

唐遺史

### 錢楊知人

錢副樞若水嘗遇異人傳相法其事甚怪錢公後傳楊  
大年故當時稱此二人有知人之鑒仲簡揚州人也少  
習明經以貧傭書大年門下大年一見竒之曰子當進  
士及第官至清顯乃教以詩賦後簡果於天禧中舉進

士第一甲官至正郎天章閣待制以卒謝希深為奉禮  
郎大年尤喜其文每見則忻然延接既去則歎息不已  
鄭天休在公門下見其如此怪而問之大年曰此子官  
亦清要但年不及中壽爾希深官至兵部員外知制誥  
卒年四十六皆如其言云

歸田錄

曹瑋知人

天聖中曹瑋以郎鎮定州王禕為三司副使疎決河北  
囚徒至定州瑋謂禕曰君相甚貴當為樞密使然吾昔



為秦州時聞德明歲使人以羊馬貿易於邊課所獲多  
少為賞罰時將以此殺人其子元昊年十三諫曰吾本  
以羊馬為國今反以資中原所得皆茶綵輕浮之物適  
足以驕墮吾民今又以此殺人茶綵日增羊馬日減吾  
國其削乎乃止不戮吾間而異之使人圖其形信奇偉  
若德明死此子必為中國患其當君為樞密使之時乎  
盍自今學兵法講邊事駸雖受教亦未必甚信也其後  
駸果與張觀陳執中同在樞府元昊叛楊義上書論亡

兵事上問三人皆不知遂皆罷去醜之孫為黃門壻具言之若曹瑋者可謂前知矣

毗陵後集

薛展狀元

薛展為兒時有相者曰此兒必為狀元及應進士舉與侍郎李紆有隙常為所抑後李知舉薛欲東歸相者又曰君今歲為狀元決矣由是乃止及策試排榜乃翰林學士壻趙日華為狀元朝列疑之諭李改去李不覺遽寫薛展二字既奏名方悟其夙怨翌日展謝李曰天假

吾手非子之才由是觀之則命已前定雖讐言敵之家亦  
不得而改也

國史補遺

### 薛邕列傳

薛邕侍郎有宰相望時崔造為兵部郎中與前進士姜  
公輔三人一同會有善相者張初繼至薛問張曰只此  
座中有宰相否答曰崔姜二公宰相也且同時崔反在  
姜之後已而姜為京兆功曹俄為翰林學士時朱泚帥  
涇原得軍民心姜上疏請為之防疏入不報及泚反德

宗悔不納姜言於行在驟拜姜給事中平章事崔更後  
半年累拜相與姜同時薛竟終於列曹而已

唐宋遺史

禹偁易名

孟蜀禮部侍郎范禹偁彭門人少不檢以飛走為事忽  
有一道士訪之曰子國家名器也何不讀書以取祿位  
須是改易姓名必及第矣候至戌年後歸本姓善自保  
愛問其名曰我安法尚也既出門失所在范感其異因  
入丹景山讀書乃改姓張舊名鶚改禹偁是時蜀無科

場遂吏書入洛長興二年於考功盧華下及第歸蜀授  
監察御史果於戌年復歸舊姓上蜀丞相狀云昔遇至  
人令易本姓往年金榜誤題張祿之名今日玉除原是  
范增之裔禹偁後終於翰林學士

詩話及  
駭聞集

### 東之奇才

張東之任青城縣丞年六十二矣有善相者云後當位  
極人臣衆莫之信後應制策被黜則天令於所黜人中  
更擇有司奏一人書寫不中程故黜之則天覽畢以為

奇才召入問策中事特異之即收上第又為狄仁傑姚崇共薦驟拜鳳閣鸞臺平章事以誅二張功封漢陽王

定命  
錄

胡旦制誥

胡狀元旦直館在京時五月一日召羅齊僧一人齋時越州海慧大師仲休在座其僧老且偃胡問有何藝僧曰薄會人倫胡曰某去知制誥遠近曰稍近然不利草著贊洗制恐有禍如何回避得胡笑而侮之曰妖人也

食訖而去其冬入西掖凡三貶官皆是草著轉贊善大夫制詞訖即被攝去第三度貶時數日前京師內外誼誼傳胡舍人獨有鞍馬之賜果自兵部郎中知制誥貶安州司馬

同前

### 盧相敗土

盧多遜之父億任秘書與李文公多來往一日多遜同見李公因同坐盧面目塵埃垢汚顏色蒼黑李詰之盧曰自少如此遂巡有兆山供養主來一龐眉老僧云善

袁許術見盧面色笑曰此敗土色及第則變而潤澤便歷華顯須是持心正平事主忠孝不如是則敗土之色再來却望應舉時不及也自是盧登上第歷兩省以至叅大政入相其面色潤澤肌體明瑩而盧之心乃大行憎愛所為多不法太平興國八年事敗南竄二十年清潤之色頓去敗土黑色宛然不異舊時路人指而驚曰非盧相之面也李公憶老僧之言嗟惋久之

洞微志

若水見僧



鄧州觀察使太傅錢若水雍容文雅近世奇士堅乞罷  
樞務遂拜集賢殿學士其日錢希白賀之留坐後廳因  
云某之此命蓋亦前定夜來方思二十年前白閣道者  
之言固不虛矣詢之乃曰某初應舉往華陰謁陳搏先  
生蒙倒屣相接坐定數目某欲問而中輟者數四賓主  
情未洽但啜茶而退臨別執手約後十日相訪至期延  
入山齋地爐中先有一僧擁衲對座良久僧熟視某而  
謂陳曰無此骨法但能得好官能於急流中勇退耳陳

又云此人在太白山累歲方一到耳某欲再求一見終  
不可得人生萬事固知不可以力取矣

見河微志此事  
與雜錄大同小

異故兩  
存之

### 韓丕甚貴

諫議大夫韓公丕未應舉時嘗在洛京有紫閣院主僧  
宗淵能知人見韓曰秀才甚貴且速達後樞密副使錢  
若水亦見僧僧驚曰前見韓秀才訝其速達今見錢秀  
才又速於韓當居其上及錢赴舉韓已知制誥及錢登

第為同州推官入直史館韓公猶在制誥之職無何韓遷翰林學士錢曰吾方直館而韓已在翰林僧言妄矣不久錢知制誥而韓遷諫議大夫罷職錢乃代焉直速而居其上也仕宦遲速信有前定彼躁進之士一或不調見他人居其上則鬱鬱無聊可謂不知命者矣

秘閣閒談

### 齊丘早退

宋齊丘微時日者相之曰君貴不可說然亞夫下獄之相君實有之位極之日當早引退庶幾保生齊丘登相

位數載致仕復以大司徒就徵保大末陳覺謀干紀事

乃餓死於青陽

南唐近事

歐陽省元

歐陽文忠公舉進士試尚書省為第一人與刁學士約  
飲於茶肆近座有數僧私語刁疑問之衆指一僧能相  
適方竊議二君刁問文忠何如僧曰此省元也刁曰作  
狀元耶曰不第二曰不第三曰不第四第五耶曰不故  
事省試第一人御行不出第刁曰然則如何曰當在第

一甲但不高爾登科之後萬苦艱難十年始改京官自此以後當富貴然有名無實刁勃然曰無文章耶無德行耶曰非此之謂也有富貴之名無富貴之實雖居大位不得享其樂語已罷去殊不以為然既而唱名果在第一甲之末為西京留守推官三年召試文入高等故事改官供職而執政者不悅止除館閣校勘久之有後命三年改官尹師魯不喜數術聞而笑之曰六年後為京官狂僧妄言矣未幾貶夷陵十年方為太子中允自

是繼歷清要遂叅大政遭劾貶黜遷徙不常而內苦死

喪疾病皆如僧言

幕府燕閒錄

堯封幕職

張堯封南京進士也累舉不第家甚貧有善相者見之  
曰視子之相不過一幕職然君骨貴必享王封人初莫  
曉其旨後堯封進士及第果終於幕職堯封乃溫成皇  
后父也后既貴累贈堯封太師中書令封清河郡王由  
是始悟相者之言知官祿之前定也

歸田錄

子履不壽

嘉祐初王文公陸子履同在書林日者王生一日見兩  
公言介甫自此十五年出將入相顧子履曰陸學士無  
背仕宦齟齬多難且壽不滿六十官不至侍從後皆如  
其言子履死後家人悉夢云帝命吾同宋次道修官制  
凡吾平生所著職官書可盡焚之未幾朝廷果修官制  
焉文公在金陵追傷子履詩云主張壽祿無三甲收拾  
文章有六丁用管輅吾背無三甲腹無三壬及韓退之

仙官勅六丁雷電下取將此雖故事而三甲六丁儼若  
天成至如日者之言與官制之修後皆符驗以此知天  
下事無一而非前定也

西清  
詩話

分門古今類事卷十



欽定四庫全書

分門古今類事卷十一

卜兆門上

畢萬筮仕

閔公元年晉滅霍滅魏賜畢萬以魏卜偃曰畢萬之後必大萬盈數也魏大名也以是始賞天啓之矣初畢萬筮仕於晉遇屯之比辛廖占之曰吉屯固比入吉孰大焉其必蕃昌震為土車從馬足居之兄長之母覆之衆

歸之六體不易合而能固安而能殺公侯之卦也公侯之子孫必復其始後萬之孫魏犢為晉卿武子是也自犢至斯遂三分晉室周威烈王二十三年遂命為諸侯後之議者謂三晉列於諸侯乃天子之命而不知其兆始於畢萬乃天命也命既前定雖欲不許可乎

左傳

懿氏卜妻

初懿氏卜妻陳敬仲曰吉是謂鳳凰于飛和鳴鏘鏘有  
媯之後將育于姜五世其昌並于正卿八世之後莫之

與京初敬仲之少也周史有以周易見陳侯者陳侯使筮之遇觀之否曰此其代陳有國乎不在此其在異國非此其身在其子孫若在異國必姜姓也陳哀比其昌乎及昭公八年楚滅陳陳桓子始大子齊自敬仲至桓子正五世矣又至哀公十七年楚復滅陳成子得政乃敬仲八世孫也懿氏之卜周氏之筮蓋已先定二百年之前矣豈偶然哉

左傳

季友為輔

魯季友莊公母弟也將生桓公使卜楚丘之父卜之曰  
男也其名曰友在公之右間于兩社為公室輔季友亡  
則魯不昌又筮之遇大有之乾曰同復于父敬如君所  
及生有文在其手曰友遂以命之嗟夫季友之生為魯  
國輔佐固係於天命而友之名先見於楚丘之卜與季  
友之手自然成文名亦由天定耶

左傳

晉侯食新

魯成公十年晉侯夢大厲壞寢門而入及覺召桑田巫

巫言如夢公曰何如曰不食新矣六月晉侯欲麥使甸人獻麥饋人為之召桑田巫示而殺之將食張如廁陷而卒小臣夢負公以登天及日中負晉侯出諸廁遂以為殉子柳子謂巫新麥以為讖果不得其所餐信乎一飲一啄皆有前定也

左傳

### 管輅占驗

魏管輅字公明平原人也廣平劉奉林妻病困已買棺器時正月矣輅占之曰命在八月辛卯日日中時林謂

不然而婦乃漸差至秋發動一如輅言清河王經去官  
還家見輅曰近有一怪欲煩作一卦卦成曰爻吉不為  
怪遷官之證其應行至頃之遷江夏太守嘗至郭思家  
有飛鳩來在梁頭鳴甚悲輅曰當有老人從東方來攜  
豚一頭酒一壺主人雖喜當有小故明日果有客如所  
占偶射鷄作食箭從樹間激中數歲女子手流血驚怖  
典農王洪直有雄雉飛來登直內鈴柱上直大不安輅  
曰到五月必遷時三月也至期果遷渤海太守後吏部

尚書何晏請之鄧颺在晏許謂輅曰君為作一卦知位當三公否又問夢青蠅集鼻何也輅曰君侯位重山岳而懷德者少夫位峻者顛輕豪者亡不可不思害盈之數輅還為其舅言之舅責其太切輅曰與死人語何畏十餘日晏颺皆誅其舅乃服正元二年弟辰謂輅曰大將軍待君甚厚當富貴乎輅歎曰吾自知有分耳天與我才不與我壽恐四十七八不見汝婚嫁兒女也吾命本在寅加月蝕夜生天有常數不可得諱但人不知耳後

明年二月卒年果四十八云

三國志

郭璞占驗

郭璞字景純河東聞喜人妙於陰陽算歷惠懷之際河東先擾璞筮之投策歎曰嗟乎黔黎將湮于異類桑梓其剪為荒壑乎遂避地東南有鼯鼠出延陵占之曰此郡東南有妖人作逆者後當更有妖樹生若瑞而非瑞辛螫之木也妖人期明年矣已而無錫縣歛有茱萸四株交枝而生若連理其年果盜殺吳興太守袁琇璞嘗



自言殺我者山宗至是有姓崇者讒璞於王敦敦將舉兵使璞筮璞曰無成又問璞曰吾壽幾何答曰明公起事必禍不久若住武昌壽不可涯敦大怒曰卿壽幾何曰命盡今日敦怒收璞斬之璞臨出謂行刑者曰欲何之曰南崗頭璞曰必在雙栢下既而果然初璞經越城間遇一人呼問姓名因以袴褶遺之其人辭璞曰但取後自當知至是果此人行刑嗟夫郭璞之術為人厭勝無不奇中自知當死而卒不免南崗之誅豈非生死前

定非厭勝可免哉

晉史

戴洋卜數

戴洋字國流吳興人妙解占候卜數人問洋曰或言江南當有貴人顧彥先周宣佩當是否洋曰顧不及臘周不見來年八月榮果以十二月十七日卒十九日臘玃以明年七月晦日亡司馬颺坐吏免官洋曰卿雖免更十一月當作郡加將軍至期為太山太守振武將軍颺賣宅行洋止之曰君不得至當還不可無宅颺果為徐

龕所逼不得之郡其他占驗甚多具見本傳不可悉錄  
今止取周顧之死司馬之遷者以見一死一生一官一  
職一行一止莫不先有定數人力區區皆無益也使奔  
競躁進者觀此而稍安義命不亦善乎

晉史

### 卜瑀知死

卜瑀字子玉匈奴後部人也少好讀易郭璞見而歎曰  
吾所弗如也奈何不免兵厄瑀曰然吾大厄在四十一  
位為卿將當受禍耳不爾者亦為猛獸所害吾亦未見

子之令終也璞曰吾禍在江南營之未見免兆雖然在南猶可延期住此不過時月琚曰子勿為公吏可以免諸璞曰吾不能免公吏猶子之不能免卿將也琚曰吾此雖當有帝王主終不復奉兩京矣瑯琊可奉卿謹奉之主晉祀者必此人也琚遂隱于龍門山劉元海僭號徵為大司農侍中固以疾辭元海曰人各有心卜琚之不欲在吾朝何異高祖四公哉可遂其高志後復徵為光祿大夫琚謂使者曰非吾死所也及劉聰嗣偽位徵

為太常時劉琨據并州聰問何時可平琚答曰并州乃  
陛下之分今茲剋之必矣聰戲曰朕欲勞先生一行可  
乎琚曰臣所以來不及裝者為是行也聰大悅署琚使  
持節平北王將軍將行謂其妹曰此行也死自吾分後  
慎勿紛紜及攻晉陽為琨所敗琚卒先奔為其元帥所  
殺

晉史

### 麻襦天馬

麻襦者不知何許人也石季龍時在魏市中乞丐言語

卓越狀如狂者乞得米穀不食輒散至大路云飼天馬  
趙興太守送詣季龍與共語乃無異言惟道陛下當終  
一柱殿下季龍不解季龍乃遣驛馬送還本縣既出城  
請步云我當有適君至合口橋見待使人如言而馳至  
橋麻襦已先至後慕容儁殺季龍尸於漳水倚橋柱不  
流時人以為一柱殿下即謂此也及元帝嗣位江左亦  
為天馬之應云

晉史

嵩貞算壽

漢安定嵩貞善算術成帝時人常自算其壽七十三綏  
和元年正月二十五日晡時死書其屋壁記之後乃二  
十四日晡時死其妻曰見算時長下一算欲以告之慮  
別有一日今果差一日死有餘恨矣其後三國時有趙  
元達者亦精於算術閒居引算自校乃歎曰吾算訖盡  
某年月日其終矣妻數見其效聞而哭泣達欲弭妻之  
意乃更算云向者謬耳尚未也後如期死嗟夫人之生  
死不離定數何二子之妙一至於此耶

見西京雜記  
及三國志

江謐碁卜

江謐字令和仕宋為鎮北長史武帝即位不預顧命甚怨望帝知之除東海太守未發憂甚乃以奕碁占卦云有客南來金椀玉杯上乃奏謐罪賜死果以金甕盛藥鵠之非偶然也

南史

尹思月占

尹思晉人也正月十五夜坐室中遣兒視月中有異物否兒視之曰今年當大水月中有人被蓑帶劍思出自



視之曰今年將有兵亂月中人乃帶甲仗矛耳後果如

其言異哉

葛稚川  
神仙傳

### 文育得銀

周文育字景德仕梁為開府儀同三司微時嘗詣卜者  
卜者曰君北下不過作令長南入則為公侯又謂曰君  
須暴得銀至二千兩若不見信以此為驗文育後宿逆  
旅有賈人求與文育博遂勝之果得銀二千兩遂南還  
武帝喜以麾下配之屢立功封壽昌縣公如卜者之言

金史卷一百一十一  
卷十一  
云南史

淳風推象

太宗得秘讖言唐中弱有女武代王太宗密召李淳風  
訪之淳風曰臣推玄象已定矣其人見生在宮中從今  
不滿四十年當有天下而夷唐之子孫且盡太宗曰吾  
求疑似者殺之何如淳風曰天之所命不可去也王者  
不死枉及無辜且更四十年而老老則慈仁雖受終易  
姓而不能絕唐若殺之為讐更生少壯多殺而逞則唐

之子孫無遺種矣帝遂止其後武氏之禍果四十年操  
殺生柄刳制天下誅大臣宗室遂攘神器而有之然卒  
復唐室者蓋天命已定不可改也淳風之言史臣稱其  
有益於時與迂泥矜神詭亂幻怪者異矣

感定錄

### 滿師九宮

西京太平坊法壽寺有滿師善九宮大理卿王璿嘗問  
之師云公某月當改官似是中書門下嘗近玉階者璿  
自謂黃門侍郎未可得若給事則已過矣常疑之後乃

改為金吾將軍果待玉階之前非前定而何

兩京記

處謙星算

扶風馬處謙鬻筮自給有一人謁筮謂曰我有秘法能  
從我學乎乃隨往至陶仙觀受星算之訣因戒之曰子  
有官祿至五十二歲幸勿道我行止於王侯之門馬得  
訣甚驗趙巨明入蜀因隨至成都王先主嘗令杜光庭  
問享壽幾何對曰王受元陽之氣四斤八兩果七十二  
而薨四斤八兩即七十二兩也馬官至中郎果五十二

而卒云

瑣言

道茂請判

桑道茂善太乙遁甲術建中初上言國家不出三年有  
厄奉天有王氣宜高垣堞使可容萬乘帝城之人莫知  
其故朱泚之亂賴以濟道茂嘗賣一鱸見李晟再拜曰  
公將來貴盛無比我今命在公手能見赦否晟大驚不  
領其言道茂出懷中書具姓名署其左曰為賊脅迫固  
請晟判晟笑曰欲我何語曰第言准狀赦之晟勉從又

以繡易晟衫請題衿膺曰他日為信再拜去後果為朱泚所污收長安與逆徒縛旗下將就刑出晟衫及書以示晟乃為奏原其死道茂居有二栢甚茂曰人居而木蕃者去之乃以鐵埋其下曰後有發而死者至太和中溫造居之發鐵而造死李明為盛唐令道茂曰君位止此而冢息位宰相次亦大鎮子孫百世明果卒後其子

石相文宗福歷五鎮諸孫皆通顯焉

閩話錄

庭芝貸死

竇庭芝與日者胡蘆先生相善一日謂庭芝曰君有大禍非遇黃中君鬼谷子不可救教庭芝物色求之得李鄴侯泌傾家結之未幾朱泚亂庭芝陷賊事平德宗命誅之泌以前事上聞特貸其死德宗云黃中君蓋指朕謂卿為鬼谷子何也

劇談

### 顧素及第

都官員外郎謝願素常言既過南省就殿試訖獨詣相國寺艾評事卜肆求筮命艾布卦言曰君必及第謝密

告曰昨日殿試賦只作七韻忘作第八韻必不得也艾  
曰據卦足下年命俱合及第餘不知其他後果於蔡齊  
狀元下及第竟不知何以得之豈非命乎

青瑣

呂憲改名

呂防嘗應舉京師與市易劉神善相遇甚喜同上之市  
飲呂曰某今歲如何劉曰且飲奉為言之久而曰將來  
春榜只有呂憲而無呂防君其改之蓋南省未試之前  
也呂遂改名憲果於李迪狀元下及第

青瑣



張李異占

太宗時太史令李淳風與張文同坐有暴風自南至李  
云南五里當有哭者張以為有樂者乃令騎馳往觀之  
遇葬者有鼓吹焉二人異占而皆應亦技之精者歟

補遺

趙明奇中

崔造初左遷洪州時州帥曹王將辟為倖有術士趙明  
者言事多奇中崔問之曰曹王奏某為副果得之否對

曰但得虔州刺史今月某日勅到必先弔而後賀又問  
曰我後作宰相否曰後四年必登庸及期果勅到授虔  
州刺史是日崔私忌果先弔後賀又謂崔曰到虔州須  
先驚恐既而到虔州崔舅源休為朱泚偽署宰相崔甚  
憂懼次堂帖召之時崔故人竇叅作宰相授崔兵部郎  
中未幾遷給事中同平章事計其日恰四年矣劉孝標  
辨命論云命體周流變化非一或先號後笑或始吉終  
凶或不名自來或因人以濟其崔造之謂與

青瑣

王蒙占色

王蒙與趙憬布衣之舊趙既入相蒙以縣令謁之將擢  
為御史時德宗方親任憬所言多從蒙自喜謂繡衣之  
拜可坐以竢也一日詣慈恩寺見僧占色蒙問早晚得  
官僧曰觀君之色未見喜兆此後若干年當得一邊上  
御史蒙大笑之數日趙公乘間奏御史府闕官因薦二  
人其一蒙也既出裴延齡問曰相公奏何事公不對延  
齡罵云看此人奏請得行否既見問上憬向論請何事

上以語裴裴曰此大不可憬所荐必其私也他日上問  
憬卿何以知此二人憬曰與臣故且親上無言他日見  
延齡上謂曰憬所請果如卿料遂寢不行蒙却歸故社  
而趙公薨後數年邊帥奏蒙為從事得假御史馬以趙  
憬之力而蒙猶不得官信乎僧之言不虛也

澠水燕談

惟象要訣

歙州三靈山人程惟象少逢異人授要訣言人貴賤壽  
夭無差御史馬遵應舉時問之惟象言二十四當成名

不出十年當知南方大邑仍損前妻再娶徵姓貴族皆  
無毫髮不應後為御史責宣城再見惟象曰不久復職  
今定四十七已而果復京東漕為之數月卒年四十七  
云呂景初自御史出通判江寧以父諱乞換惟象曰已  
別有判果移行州張方平問一丁酉人命惟象曰天賓  
星行初度不當作內臣壽止五十四已而果然乃嵇平  
也其他應驗尤多故杜待制杞曾詩云有驗如有神此  
亦可以見人生無一而非前定者

澠水燕談

章盧同兆

術士李生傳管輅軌革法人影頗有之丞相章公嘗問之卦影畫水邊一月中有十口未幾除湖州又盧龍圖秉亦使占卦影同前之象未幾亦除知德州字雖不同而其影皆符合

同前

老人飛著

明皇將平內難之前遲疑未決一日於春明門外見一白衣烏帽老人賣卜上請占之俄有著一莖突然飛出

挺於空中老人笑曰大吉此卦只宜卜取天下餘悉凶  
然利在三日之內上乃與劉幽求鍾紹京等入平內難  
安北軍捕逆黨誅韋后尊睿宗為君上使人訪前老人  
莫知其處遂於所見地立廟號阿父神上親制碑詞及  
書以表其異焉夫蓍筮之靈於人何也曰蓍龜不與於  
人聖人用之所以兼人物之智耳卿士從庶民從兼人  
之智也龜從筮從兼物之智也明皇既謀於幽求等而  
又卜於老人其亦兼人物之智歟

紀異

分門古今類事卷十一



欽定四庫全書

分門古今類事卷十二

卜兆門下

隗炤責龔

隗炤汝陰人善易臨終書板授其妻曰後當大荒雖窮慎莫賣宅却後五年有詔使姓龔來頓此亭其人負吾金以此板責之炤亡其家大困不敢賣宅期日果有龔使者止亭中妻脅板責金使者惘然曰賢夫何善妻曰

善易而未嘗卜使者取蓍筮之歎曰妙哉隗生乃告炤妻曰吾不負金賢夫自有金耳知亡後必暫窮故藏金以待所以不告兒婦者恐金盡而困無已也知吾善易故書板寄意金有五百斤盛以青甃覆以銅盤在堂屋東頭去壁一丈入地九尺還掘之皆如其卜噫炤之前知固妙矣而龔之筮不亦妙乎

晉史

僧泓戒說

浮屠僧泓者黃州人與張欽之善欽之弟訥之疾殆泓

曰公弟位當三品不足憂也已而漸愈後果至三品嘗  
為燕公張說市宅戒曰無穿東北隅他日又見說責曰  
宅氣索然云何共視之東北隅有三坎驚曰富貴一世  
而已諸子將不終後說子果皆污賊死斥云

唐史

### 德裕食羊

李德裕分司東都名僧問休咎僧結壇作佛事觀之曰  
當還公問其事僧云公生平當食萬羊今來未盡五百  
所以當還公驚歎曰我元和十三年為丞相張公從事

於北却夢行晉山上滿目皆羊有牧者曰此相公平生  
所食羊也嘗記此夢無有知者師言驗矣後旬日振武  
節度使遺書於公餉四百羊公遽召僧告之僧曰公不  
還矣果貶崖州竟沒荒裔

宣室志

### 杜悰救禍

李生者杜悰門下術士也悰任西川節度使時馬植罷  
黔南赴關道出成都李見之謂悰曰受公恩久思有以  
效答今得之矣黔南馬中丞非常人也且公將有大禍

非馬中丞不得救宜厚遇而結之惛驚信其言植將發  
惛以厚幣贈之仍令邸吏為植於闕下買宅所用之費  
無闕焉植至闕但知感惛而不知其旨尋除光祿報至  
蜀惛謂李生曰貴人敗闕也作光祿勲而已生曰姑待  
之俄進大理卿又遷刑部侍郎充鹽鐵使惛始驚憂俄  
而作相懿安皇后宣宗幽崩惛懿安子壻也忽一日內  
榜子索檢責宰臣元載故事植諭旨翌日延英上前萬  
端營救植素辯博能回上意事遂寢惛乃安其事與竇

庭芝桑道茂差類故備錄之以見禍福前定惟深於數

者得而知也

蜀耆舊傳

不愆飛雉

杜不愆廬江人也少就外祖郭璞學易卜屢有驗高平  
郝超年二十餘得重疾試令筮之不愆曰按卦言之卿  
所苦尋除然宜於東北三十里上宮姓家索其雄雉籠  
盛置東簷下却後九日丙午日午時必當有雌雉飛來  
與交既而雙去若如此不出二十日病可除又是休應

年將八十位極人臣若但雌逝雄留者病一周方差年  
半八十名位亦失超時正羸篤慮命在旦夕笑而答曰  
若保八十之半便有餘矣一周病差何足為淹然未之  
信或勸依其言索雉果得至丙午日超卧南軒之下觀  
之至日晏果有雌雉飛入籠與雄雉交而去雄雉不動  
超歎息曰雖管郭之奇何以尚此超病彌年乃起至四  
十卒於中書郎

晉史

崔圓大貴

崔圓微時欲舉進士於魏縣見李含章云君合武舉出身官更不停直至宰相開元二十三年應將帥舉又於河南充鄉貢進士其日於福唐觀試遇勅下便於試場中召拜執戟參謀河西軍事後官果不停不踰二十年拜中書令趙國公又圓嘗作司勳員外初釋服往見會昌寺克慎師師笑云人皆自臺入省公乃自省入臺從此常合在槍槊中後當大貴無何為刑部員外兼侍御史充劍南節度後入劍門每行常有兵戈未逾一年便



致勲業崔入蜀常自說其如此

蜀異志

### 穆生官氣

穆應之者後唐內園使延輝姪也天成三年赴舉京師時趙鳳知舉甚嚴峻應之頗憂懼乃於宋巡官卜卦卦成宋曰先輩今春未有喜座中一僧見之有不允之色乃謂穆於寺塔前說話曰宋巡官甚不工貧道喜袁許術見秀才面上官氣已動即三五日成就驟承帝王非次之恩穆曰何由得此僧曰君豈自由宿生之分如此

穆殊不信後一日應之因省見延輝與內園吏微服入園中潛遊會帝乘小駟與數宦官出長春殿倉卒潛竹林邊帝召見穆之稱臣延輝之姪應舉已試闌入內苑願歸首領帝急召延輝問曰此卿之姪耶奏曰是帝欣然曰卿乃有骨肉赴舉大是美事立命武德使孟漢瓊宣名往中書與一好官授河中府永樂主簿翌日詣寺求前僧皆曰無之乃於東室見古畫梵僧皂衣面貌皆昨日所見也授官之日去卜之日才五日僧云宿生之

分豈不信哉

洞微志

章翁異驗

蜀孟氏朝有章翁輶者也妙於易筮時方詔下有進士  
文谷田淳謝彥秀等訪之章消息既久謂谷曰得非求  
名乎曰然翁曰使子藝出古人之上其如命何水中之  
月了不可取謂彥秀曰櫃實有寶牢守局鑄子欲得之  
非五年不可謂淳曰良金在冶即當成器然用而必傾  
慎之可也淳果是年及第負文學性剛介不畏強禦自

犀浦簿改授龍游令排斥權貴屢遭傾覆後但縱酒狂吟免禍而已嘗有詩云閒行閒坐復閒吟一片澄然太古心拾得好詩清似玉練來虛府靜如琴已將蛇足師陳軫懶把龍頭愛華歆必也長磨到如此退身何更羨雲岑文谷字太虛聲迹甚著入場屋中衆謂俯拾及擣出不利上書訟主文許以來年狀元谷憤然致書謝曰輕則輕矣何須更掛於平衡醜則醜焉不必重窺於定鑑遂不復應舉謝彥秀果五年方成名悉如章生之言

妙哉  
該間錄

孝先共占

費孝先字景韶善卦影歌嘗一日蜀州張秀才者使占卦拈得寅時又有一人亦姓張曰某在家亦定得寅時來乃共占之得鼎卦歌曰躬謙身長福有路不尋常雙五當言道將鷄作鳳凰蜀張曰此某本意躬謙身長福某姓張也有路不尋常必得道也某為家計不興去年為思安鎮鳳凰山計長老傳一陰醬法某遂合得萬餘

斤未敢賣先問卦雙五是十當言是計字鳳凰者鳳凰  
山將鷄乃醫字也餘一張亦曰此事亦應某娶常氏為  
妻二十餘年無子夫妻焚香至誠拈得寅時止以某欲  
取猶子為兒妻欲取常家外生為兒故看卦決之今歌  
云躬謙身長福是張家猶子也猶子小名曰計郎有路  
不尋常是不要常家人也雙五當言亦計字也將鷄作  
鳳凰乃是求子為嗣也其妙如此

蜀異志

蘇協貴子

偽蜀有道士開卜肆言人生平休咎皆如目覩廣政中  
進士蘇協杜希言同往訪之道士謂蘇曰秀才明年必  
成名蘇未之信道士曰成固定矣兼生貴子時蘇夫人  
方孕稍信之又謂杜曰秀才成何太晚耶杜不樂愠而  
退明年蘇及第杜果無成蘇過杏園燕生一子即易簡  
也杜稍信道士之言再謁之問名第雖晚成未審祿始  
何年秩終何地道士曰秀才勉之必成大名然其事稍  
異君成名之日在蘇君長子之座下杜曰欲辭得乎道

士曰從此以往未之或知也其年蘇授彭州叅軍累任  
外官其子易簡果以狀元及第端拱三年由翰林學士  
知貢舉杜始得成都解南宮奏名御前登第授常州軍  
事推官竟不祿如道士之言嗚呼人之稟賦信有定數  
古人謂宰衡之與皂隸貴賤殊也容彭之與殤子壽夭  
異也倚頓之與黔婁貧富別也陽文之與敦洽妍醜間  
也咸得之自然不假於才智以此而觀蘇杜之事安得  
不謂之前定耶

者舊傳



董祐賦題

進士董祐之咸平元年將赴舉頗怯於公戰嘗歇馬於  
信陵君廟下忽遇秣陵進士許驥自南來亦將求薦於  
府叙話久之許曰適於一院見一翁云開祿命書甚靈  
盍往謁之二人同詣各說其生之年甲翁曰據命二君  
未見食祿之期許戲之曰今年狀元誰也翁曰此却知  
之遂於祿命簿後揭出一葉上畫一人極肥大被金紫  
下注曰咸平元年狀元三十董許莫能辨又問曰府試

題可知乎曰豈惟府試雖省試監試皆可見又於簿後  
揭一葉上畫赫日一輪此省試賦題也又一葉亦畫日  
一輪曰國子監賦題也二子莫測已而收其簿入於院  
後莫窮其跡後府試離為日賦監試迎長日賦省試仰  
之如日賦狀元乃孫僅最豐博年果三十其年二子果  
不利於春官此可以見科舉題目且皆前定況得失乎

錢希白  
小說

王泌遇僧

進士王泌李昭一江儼三人同詣二相公廟欲作筮於  
張眼見不在乃於門側見一老僧坐戶限上手執鐵磬  
謂泌曰秀才非卜今春事乎貧道布卦得否乃同坐西  
廡僧乃探懷中卜錢疊為一浮圖命泌手觸之錢數於  
地僧曰卦成風地觀之山火賁乃合掌斷曰東行無門  
西去華山道塞畏難遊子為患泌曰易中無此僧曰焦  
貢易林中詞也此卦吉當成然安於瀘屯於解江李二  
人曰我何如僧曰不必布卦面可盡見須得王及第李

次之江又次之李則一幕蓋天江則一邑掃地言訖趨  
殿後不出三子跡之絕無人詢其門者曰適見三秀才  
自言語不見有僧三子甚駭其年王果登科除瀘州推  
官考滿改解州推官卒所謂屯於解也李昭一端拱二  
年登科卒於永興軍節度判官此一幕蓋天也江淳化  
三年登科新津主簿李順之亂踐其邑乃潛竄而卒此  
一邑掃地也非前定有素彼僧烏得知之

名賢  
小說

利用極貴

致政少師趙公平叔嘗話海州推官王務本頃在筠州依祀郡守一日間有術者頗精郡守乃召賓寮呼術者令遍視座客何如座中有一班行為巡檢術者云巡檢極貴衆官皆不及坐客皆哂之郡守因問王秀才何時登第術者顧而言曰須是巡檢入兩府方成名座間無不哂笑而罷後王累舉不第忽聞巡檢者以和虜功為閣門使王頗思前事又十餘歲巡檢者拜樞密使王生殿試下遂往謁樞密因語當日術者之言翌日因對面

陳其事於上前乃召試殿庭特賜第一甲及第巡檢者

乃侍中曹利用也

幕府燕閒錄

王生聽聲

術士王生金陵人瞽而善聽聲時丁相謂先罷叅知政事知金陵忽一日車從出自南門王於稠人中潛聽其馬蹄聲大言於衆曰叅政月中必召大拜也月餘果急詔歸覲再拜中書踰年真宗晏駕丁充山陵使時王生來京師丁聞其來甚喜召宿書院厚待之俟曉入朝俾

聽馬蹄聲退語諸子曰相公福壽堅固但蹄響有西行之兆諸子責之曰爾知相公充山陵使故有是說耶王不對後有朝僚問之曰蹄雖西去而無回聲丁果罷相分司西京繼有南崖之命夫古之術士以形聲二相言人之吉凶固有之矣蓋人之形色由衷而出形聲自外而彰參之可驗惟馬蹄之響外物爾非自我而形也不知王生之術以何而得致其妙之如是哉

該聞集

### 文泰言命

司天春官正丁文泰彭門人精陶隱居三命言災福多  
驗李虞部畋景祐二年赴南省試訪詢之丁曰子之命  
金水正在高強金水必主文學然凡五星雖得位以時  
占之則有順有伏有逆子之命水在日前伏但有聲無  
實若順則有科名也畋問逆又如何曰雖在宮分得力  
而多患難又謂畋曰子雖無科名而官至五品壽僅百  
年畋後南省試天得一以清賦破題云冲者道之用也  
氣者一之本焉一既生於無體清亦出於先天是年過



省至御前試後切聞復考官將畋家狀與彼親之家狀

互粘於卷子上

其年未有彌封之制

彼親尋及第一命授職官卒

畋今員郎致仕爵上護軍年已耄期矣丁生之言何神

驗如是

同前

### 積善得狐

成都楊世者善卜嘗告王積善曰某日君得一野狐初  
以為妄也至期有村民挈一布囊而至曰偶得一狐故  
以奉獻嗟乎楊世之卜以數而知之一狐之微不可妄

得況富貴功名哉

蜀耆舊傳

崔張不協

張曉崔昭緯中和初西川同舉進士相與詣日者問命時曉自恃才名藉甚人皆目為將來狀元崔生分居其下無何日者殊不顧曉但目崔曰將來萬全及第曉有愠色日者曰郎君亦及第然須待崔君拜相當此時過堂既而曉以憂懣不終場昭緯是年首冠曉以詩刺之曰千里江山陪驥尾五更風水失龍鱗昨夜浣花溪上

雨綠楊芳草為何人崔甚不平會夜飲崔以巨觥飲張  
張起堅辭崔曰但喫却待我作宰相與君取狀頭張怒  
拂衣而去因之不協後七年崔自內廷大拜張後於裴  
贄下及第果於崔下過堂夫才之不可恃也久矣曉雖  
有才其如命何

蜀異志

### 垂應紫堂

王垂裕王局化道士深於紫堂王文康初作小官垂裕  
見之曰後若干年當奉使入川又若干日當知成都皆

如其言其徒李垂應王嘉言皆傳其術趙清獻抃嘗曰  
僕知江原縣日垂應嘗言某年當入蜀後果授梓州路  
轉運至梓州得垂應書言非久移成都已而果然僕官  
滿垂應送至新都彌牟鎮曰後六年再來此攀迎台旆  
彌牟距漢川二十里垂應不肯前曰漢川鼎寺丞欲召  
某而其人天獄星動故不敢見未幾鼎果以公事下獄  
僕後六年知成都先是僕以言事謫虔州一日途中得  
垂應書云是行也乃必來成都之兆宜切自愛其精如

此王嘉言者字仲謨其師垂裕嘗曰竢垂應哀則汝通  
矣近年垂應多病而嘉言之驗果日盛一日去年言侯  
溥生日後三十日有小遷改如期遷職官今年言段運  
判通甫春季內有喜信入夏乃見果立夏前一日得報  
自提倉改運判後九日拜命又先告人曰王史館寅年  
必出中書今年春末又告人曰王相且出矣聞者莫不  
非笑之既而果然夫推步卜筮皆技也能以技自顯於  
一世者非特本之於天亦由於數觀嘉言之通必竢垂

應之衰而後驗不謂之數可乎

成都廣記

曹谷命書

曹谷善星厯衍數談事如神為王欽若作命書云七十年中一一加弄珠灘上事堪誇碧油幢下聞啼鳥千里招還上漢槎欽若果七十二歲建節知襄州正得千日召還又云周匝將臨壬戌歲定鼎門前春色異一千日上少三鰲再入和羹宜盡瘁後欽若判西京七百日再入政府卒乃壬戌歲也又云臨去尚猶聞禁漏異姓嘉名

在史書欽若死之夕漏將盡無子女婿張懷玉主後事  
冀公出入將相富貴壽考宜有定數至於漏刻不差則

谷之術信妙矣

成都廣記

### 中和布算

太宗皇帝嘗遊後苑登一小亭制度極湫隘顧謂近侍  
此處尤爽塏而土木卑陋如此遽命毀去將重新之於  
梁間得數板記乃建隆初太祖所造上頗悔之新亭之  
意遂寢一日司天監邢中和奏事得對上因以板記年

月日謂中和曰卿試算斯人今如何中和指笏布策畢奏曰斯人已亡矣上曰何也曰數已盡矣上曰非人而物如何中和曰凡萬物異類皆不能逃五行成敗之數雖物亦當廢矣初帝以此為嫌及得中和之奏乃釋然徐謂中和曰此苑中一亭子其年月乃所建人時也中和曰凡臺榭樓閣屋木數盡則廢矣上曰卿之言斯人已亡何也對曰五行木為仁仁主壽臣以其壽而言之

太宗甚嘉之賜予頗厚

幕府燕閒錄



從周詩卜

何龍圖中立初西川郭從周精於卜筮乃以繡素求之  
從周詩以贈之云三字從來月正圓一麾從此出秦關  
錢塘春色濃如酒貪醉花間卧不還公後八月十五日  
改知制誥以言邊事出知秦州移之杭乃捐館何郭君  
卜筮之明若此抑亦以前定而知之也惜乎知秦慶而  
不入兩府自公始云

翰苑  
名談

趙公寄詩

治平中龍圖閣直學士趙公抃鎮成都有張山人不知  
所居數至李道士之舍一日語李曰為我白趙公促治  
行裝當入覲且叅大政趙異之令李與俱來張固辭曰  
與趙相見自有期今未可也未幾果膺命叅政柄及  
出鎮青社時熙寧五年張遺書云當來相見公喜曰張  
山人且來矣久之無耗至秋再詔成都方悟曰山人言  
來乃吾當往抃遂寄詩曰不同叅政同時入  
謂呂餘慶也學尚書兩度來  
張詠也到日先生應笑我白頭猶自走塵

埃之句嗟夫凡人一行一止猶有前定况公之出將入  
相為時重輕豈偶然哉

澠水燕談

### 李生三韓

進士李生者久未第訪日者訊命日者曰君遇三韓即  
發祿李乃徧謁貴人韓姓者冀蒙推挽至元豐初朝廷  
遣使高麗乃李故人召與同往至其國考圖籍乃古三  
韓之地使還賜出身日者之言如符契之合此可以見  
發祿之有地也

同前

鄭滂朝官

滂嘗自言為大理司直常歎淹滯有僧寶銳知人休咎  
因問之乃曰司直朝官終得但中間合為數政使府官  
耳既而果歷河陽浙西淮南累至檢校郎中方除比部  
員外郎亦如銳師之說銳師說事雖不皆中然此極驗  
者以陰陽前定之事耳

翰苑  
名談

分門古今類事卷十二